



*Selasa, 30 Agustus 2022*  
**Ogen: Roma 12:12-14**



*Mereken Tumpangan*



**K**inata si terjadi genduari i bas kegeluhenta e me kurangna keamanen ras kenyamanan nggeluh. Bukti na adi lawes kita nadingken rumah sada jam saja labo kita pang la ngunci rumahta, bage pe pintu gerbangna. Kimaun tupung kita i rumah pe si kunci nge pintun rumah, la cukup terjeng itutup saja. Kerina barang-barang si ipake kita termasuk pe sepatu tama kerina i rumah. Engkai maka bage? Mbiar kita bene sabap labo aman kondisi sekitar rumahta. Adi lit pe kalak nukutuk pintu, si sungkun lebe i ja nari, adi la sitandai sorana, labo kita nggit mbuka pintu e. Tuhu-tuhu kal perlu waspada. Wari enda tema renungenta 'mereken tumpangan,' uga nge ndia ari? Entah enggom enda terjeng tema ngenca?

Alokenlah kalak si reh kesilang ku rumahndu! Enda perkatan Paulus man perpulungen i kuta Roma. Kai ngenda maksudna? I bas bahasa Inggris ipakena istilah 'hospitality,' si mbages kal ertina. Labo terjeng rumah inganta tading, di reh temue si alo-alo tapi ertina mereken rasa aman ras nyaman man temue si reh ku rumahta. Kita si mada jabu pe ramah, murah senyum, ras nggit mereken kai si iperlukenna. Di kune temue e kurang sehatna reh ku rumahta, usahakenlah bereken tambar man bana, cukupken penganna ras istirahat ia alu teneng, seh banci ia madan. Di kune si reh e lit ndai perbahanenna si jahat erbahansa ia iayak-ayak kalak, reh ia cebuni ku rumhata, bereken ia perlindungan, seh maka si ngayak-ngayak ia ndai pe dungna lawes nadingken ia. Di kune ia gelapen bas perdalanan, la lit sima-simana bas kuta e, adi bas penginapen la cukup senna, alo-alo kalak si bage, bereken panganna, pekesahken ia kentsik seh wari terang pepagi teruskenna ka perdalinnenna, man bana bereken pangan perbekalenna i bas dalin gelah la ia kelehen seh i kutana. I bas kita ngalo-ngalo temue situhuna kita ngaloken pasu-pasu, sabap baci saja e persuren Tuhan naruhkan pasu-pasuNa man bana.